

## فريق التفريغ بموقع الطريق إلى الله

يقدم  
من سلسلة افتح لي قلبك  
لأنك غالية

(باللهجة المصرية)

لفضيلة الشيخ: حازم شومان

رابط المادة: <http://www.way2allah.com/modules.php?name=Khotab&op=Details&khid=29100>



السلام عليكم ورحمة الله وبركاته

الحمد لله وكفى وصلاةً وسلامًا على عباده الذين اصطفى، اللهم لك الحمد كله ولك الملك كله وبيدك الخير كله، إليك يرجع الأمر كله، اللهم صلّ على حبيب قلوبنا وطبيب قلوبنا وشفيعنا يوم العرض عليك محمد - صلى الله عليه وسلم - في الأولين والآخرين والمالأ الأعلى إلى يوم الدين، اللهم اهدنا بهداك، اللهم اهدنا بهداك، اللهم اهدنا ويسر الهدى إلينا.

**لأنك غالية**

يا أول قلب نبض بلا إله إلا الله بعد قلب رسول الله - صلى الله عليه وسلم - قلب خديجة، لأنك غالية يا أول دم سال في سبيل الله في الإسلام كله.. دم سمية، لأنك غالية يا أول واحدة هتجري تدخل الجنة مع رسول الله صلى الله عليه وسلم يوم القيامة، لأنك غالية بأناديك أختي في الله لما نتكلم ونقول يوم القيامة خمسين ألف سنة، خمسين ألف سنة، ده عمرنا لما نشيل منه النوم، ونشيل منه الـ ١٥ سنة ولا الـ ١٤ سنة اللي قبل البلوغ، ونشيل منه المواصلات والأكل، لما نشيل منه المكالمات مش هيفضل خمسين ألف ساعة، خمسين ألف ساعة هتتحاسبي عليهم في خمسين ألف سنة! يعني هتتحاسبي على الساعة في سنة، إنت في الدنيا كنت بتاخدي السنة علشان تدخل في تمتحني مادة في ساعة، إنت كل ساعة في الدنيا دي هتتحاسبي عليها في سنة يوم القيامة.

يعني يوم القيامة لما الناس تبقى هتموت خلاص.. لسه أد إيه؟ لسه ألفين سنة، الحمد لله هانت، خمسين ألف سنة ده من يوم ما سيدنا آدم نزل الأرض لغاية دلوقت مش خمسين ألف سنة يعني هتقعدي يوم القيامة هتقفي أطول من لما سيدنا آدم فضل في الأرض لغاية يوم القيامة خمسين ألف سنة يعني الدولة الأموية والعباسية والفراعين والتلاتين أسرة بتاعة الأسر الفرعونية والقرن التاسع عشر والعشرين بكل أحداثهم مش خمسين ألف سنة.

**لحظة رعب أشد من خمسين ألف سنة**

خمسين ألف سنة انتظار يعني لو إنت عارفه إن بعدهم الجنة بس هتستتي خمسين ألف سنة مش هتقدري تستحملي خمسين ألف سنة فيهم لحظة الرعب اللي فيها أشد من الخمسين ألف سنة كلهم، لحظة لما الصحف هتطير ويا إما كتابك ييجي في يمينك يا ييجي في شمالك.

أكثر لحظة رعب شفيتها في حياتك إيه؟ أكثر لحظة انتظار شفيتها في حياتك إيه؟ حد حببيك عمل حادثة ودخل عمليات - ربنا يعافي أحبابنا جميعًا يارب ويعافي المسلمين جميعًا - وواقف على أوضة العمليات الواحد مستني هيخرج الدكتور يقول الحمد لله ربنا نجّاه ولّا حاجة تانية، ولّا حد طلع له ورم وخاف أحسن يكون سرطان ولحظة ما هيستلم التقرير بتاع التحاليل ده كده ولّا كده، ولّا واحد متهم في قضية والقاضي هينطق يا إعدام، يا براءة، يا سجن مؤبد يضيع فيه شبابه؟ أكثر لحظة انتظار دُقيتها في حياتك إيه؟

### لازم تحسبها صح

عمر كل ده ماهيجي في لحظة الصحف وهي بتطايير وإنّ مستنية الصحيفة هتيجي في إيدك اليمين ولّا في إيدك الشمال إنّ بالذات لازم تحسبها صح، لازم تحسبي لبسك اللي إنّ لابساه هيدخلك الجنة ولّا يدخلك النار؟ لازم تقفي قدام المراية وتبصي للبسك ده يرضى ربنا عنه ولّا يغضبه، لازم تبصي وتفتحي دولاب هدومك، وتبصي لأزيائك كلها دي هيكتبها ملك الحسنات ولّا ملك السيئات؟

لازم يا أختي في الله تبصّي لهدومك دلوقتٍ وتقولي دي هتخلّي كتابي ييجي في أيدي اليمين ولّا في أيدي الشمال؟

أختي في الله المشهد الرهيب اللي أنا عاوز قلوبنا تتفتّح عليه مشهد رسول الله - صلى الله عليه وسلم - وهو داخل بيته ويلبس لأمة الحرب ويلبس لبس الحرب وملامح الجدّية على وجهه وأبو بكر وعمر منتظرين النبي بلبس الجهاد وكبار الصحابة خارجين والرسول خارج يقود جيش وأمّهات المؤمنين واقفين الرسول رايح فين - عليه الصلاة والسلام - غزوة من الغزوات ممكن الدماء تسيل فيها، ممكن المسلمين يقتلوا فيها، ليه علشان إيه؟!

**علشان يهودى راود امرأة مسلمة عن كشف وجهها الرسول - عليه الصلاة والسلام - قال دم المسلمين يسيل بس وجهك ما ينكشفش، بس حجابك ما ينكشفش ده علشان راودها عن كشف وجهها أمّال لو كان راودها على لبس التونك ولّا لبس بنطلون ولّا لبس شميز ولّا لبس كعب ١١ سم ولّا وضع عشر أنواع ماكياج في وشها ولّا لبس طرحة اسبنش كان حصل إيه! وكان قامت إيه!**

لأنك غالية الرسول عمل كده لأنك غالية دمنا كان هيسيل علشان إنّ غالية، علشان حجابك، علشان عفافك، علشان نحافظ عليكِ لأنك غالية، بأكلمك النهارده لأنك أغلى حاجة في حياتنا لأنك جوهرة الإسلام لأنك اللؤلؤة بتاعة الدين ده، لأنك أغلى حاجة في حياتنا كلها.

أنا بأكلمك عن الحجاب الشرعي السليم هو إيه؟ يا ترى الشيخ اللي قال لك من غير طرحة بس حشمة.. حجاب

٥٩%، هو ده الصح؟! ولّا الشيخ اللي قال لك بالشورتيد أو بالباروكة الحجاب الشرعي ده صح؟!!

**ولّا الحجاب اللي حبيب الله حببيك محمد - عليه الصلاة والسلام - ارتضاه لزوجاته أمّهات المؤمنين أنا عايز كل أم معانا دلوقتٍ تقفل الباب بنتها ماتعرفش تخرج وتقفل الشباك علشان ما حدش يعرف يخرج خلاص أنا عايزك تفتحي لي قلبك، أنا عايزك تعيشي معايا دلوقتٍ بقلبك أنا أكثر واحد في الدنيا خايف عليكِ أنا أخوكي لو حد**

ه يخاف عليك في الدنيا هبقى أخوكي الرسول - عليه الصلاة والسلام - يقول "لا يؤمن أحدكم حتى يحب لإخيه ما يحب لنفسه" صحيح البخاري

أنا نفسي في الفردوس الأعلى مع رسول الله - صلى الله عليه وسلم - اللهم آمين، نفسي لك إنت كمان بنفس الموضوع أنا أخوكي أخوكي اللي بينصحك، أنا لو شفت أختي هتوقع نفسها في حفرة فيها نار أنا هأشدها، هامسك فيها مش هسيبها تقع مهما قالت عليّ شديد عليها، مهما زعلت وقالت لي إنت بتشدّ عليّ ليه؟ إنما أنا لازم أنقذها أنا شايفك بتعرضي نفسك لخطر جهنم وعايذ أنقذك لإنك غالبية علينا مش عايزينك ترخصي نفسك مش عايزينك تندمي، مش عايزينك تخسري لإنك غالبية علينا.

### ليه كل حاجة بقت عادي؟

دلوقت يا جماعة الواحد قلبه بيتحرق، قلبه بيتحرق وهو عايش في مجتمع وهو شايف كل حاجة بقت عادي البنت تمشي مع الولد عادي وإيه يعني؟ البنت تطلع رحلة مع أصحابها عادي وإيه يعني؟ البنت تركب عربية مع ولد ده مين ده يا بنتي ده حبيبي؟ لأ.. لأ ده صاحبي، حبيبي واحد تاني، البنت تقعد على كافييه بس يكون كافييه متطور وراقي وتشرب شيشه عادي، بنت في القاهرة ولّا في إسكندرية تدخن في الشارع عادي، البنت ده بيعت لها مسج وده بيعت لها مسد وهي تسجل رقم ده وتكلم ده وده يبصّ لها وده يضحك معاها وده يمشي معاها وده يتكلم معاها عادي، إن ولد يتصل بنت في بيتها ويكلمها دلوقت عادي يا جماعة، إن ولد يمشي مع بنت في الشارع عادي يا إخواني، إحنا وصلنا لإيه؟!، إنت وصلتي لإيه!؟

الواحد قلبه بيتقطع والشباب غلبان يمشي في الشارع بنات متبرجات، يدخل الجامعة بنات متبرجات، يفتح التليفزيون بنات متبرجات، يركب المواصلات بنات متبرجات، الشباب بيقهرو ويتجيبو تكلم أمها العفيفة المحجبة تقول لها بنتك لبسيها الحجاب الشرعي تقول لك دي كنتوتة يا عم الشيخ، كنتوتة!؟

### بالله عليك بالله عليك إنت شايفة نفسك كنتوتة؟ إنت مقتنعة بالكلام ده إنك إنت فعلاً كنتوتة؟

لكل واحدة قاعدة قدامي دلوقت وللقنوات الفضائية اللي بيتفرج عليها البنات بتدّمّهم، الصبح لازم تجيب كلييات الأول علشان الفساد يبدأ من الأول وبعد كده كلييات وفتنة وتضييع من غير ما الدور يتكلم بشيخ يجي في النصف كده ماينفعش يا عم الشيخ المكالمات جاية يا عم الشيخ، يا عم الشيخ حجاب من غير ماكياج يا عم الشيخ لا يجوز لايجوز يا أختي، طيب حجاب من غير بارفان يا عم الشيخ لا يا أختي البارفان لو كان بارفان خفيف يا أختي يجوز ومايعملش أي حاجة ولايضر والماكياج الخفيف يا أختي يجوز لو ست سبع أنواع بس، طيب والنقاب يا عم الشيخ؟ يا أختي المكتوب على الجبين لازم تشوفه العين ولو المكتوب على الجبين غطيتي وشك ما فيش عين هتشوفه يا أختي، طيب النقاب يا عم الشيخ؟ النقاب لا أصل ولا فصل له في الإسلام ده عادة بدوية يا أختي، طيب وخطيبي يا عم الشيخ؟ خطيبيك لو إنت فتاة متحررة ناضجة عاقلة أخرجي معاها واتفسحي معاها وسافري معاها؛

لأنك تعرفي تحافظي على نفسك دي فتوة حقيقية ولكن لو إنت قروية وسازجة وفتاة يضحك عليها لأ يبقى لا يجوز يا أختي.

يا عم الشيخ هو لَمَّا كان صحابي يخطب صحابية كانوا يخرجوا يتمشوا مع بعض في المدينة المنورة؟ لأ، يا عم الشيخ هو كان ممكن صحابية تروح تكلم الرسول - عليه الصلاة والسلام - بماكياج خفيف؟ لأ، يا عم الشيخ هو كان ممكن الصحابيات يروحوا يصلوا في المسجد التراويح وهم حاطين بارفان؟ لأ، يا عم الشيخ هي أم سليم وأم سلمة ونسيبة بنت كعب كانوا بيلبسوا تونيك وبنطلون فضفاض واسع؟! لأ، أمال جبت الفتاوى دي منين يا عم الشيخ؟! وبتصيح بنات المسلمين ليه يا عم الشيخ؟! ومش تتقي الله في الناس اللي بيسمعوك، اللي هيشهدوا عليك أمام الله يا عم الشيخ؟

### حجاب أشد من التبرج

المشكلة دلوقت يا جماعة إن واحدة قاعدة سمعاني حاطة على راسها طرحة جميلة وتقول الحمد لله أيوه كده إنت راجل شيخ معتدل وإنما أنا الحمد لله على التونيك اللي ساترني والحمد لله على البنطلون اللي مغطيني الحمد لله بس المشكلة بس إن أنا لَمَّا الدنيا بتبقى حر الماكياج بيسيح وأنا قاعدة أسمع البرامج الدينية وأتملى في جمال الإسلام.

طب يا أختي إنت كده شايفه إنك محجبة بالطرحه دي؟ طب والكحل؟ طب والروح؟ طب وكريم الأساس؟ طب والمانيكير؟ طب والكعب ال ١١ سم؟ طب والبنطلون؟ طب والبلورة؟ طب والقصة؟ طب وال... ؟  
وكل ده وإنت معتقدة إنك إنت محجبة؟! كل ده وإنت شايفه إنك إنت محجبة؟

### أكلّم مين ولّا مين؟

الدرس ده يا جماعة قبل ما الواحد يتكلم فيه الواحد كان بيعاني أكلّم مين؟ أنا كل درس أنا بأقول لكم في الأول أنا بكلّم مين أنا دلوقت بكلّم مين؟ أنا بكلّم اللي ضاربة شعرها في الخلاط قبل ما تخرج للشارع؟ ولّا بكلّم اللي عامله موزمبيليه وماشيه؟ ولا بكلّم بنات ثانوي وإعدادي اللي بقوا جرح في قلب الإسلام؟ سنّهم ده زمان كان يقولوا عليه البنت إستخبت، في القرى البنت إستخبت يعني وصلت للسن اللي هيتقدم لها عرسان تقعد في بيتها عيب تشوف ولاد ولّا تختلط ولّا حد يشوفها، دلوقت أول ما البنت توصل ثانوي انزلي إشتري بنطلون جينز استرثش إنت عامله في نفسك كده ليه؟! إنزلي هاتي ماكياج، إنزلي هاتي بارفانات.

البنت طلعت.. مش البنت إستخبت، البنت طلعت، باب جهنم كبير اتفتح على أمة محمد.

يا أمة محمد أنا خايف عليك الرسول - عليه الصلاة والسلام - لَمَّا شاف واحد يبصلي بس صلاة غلط رجع بعدها قال له "ارجع فصلّ فإنك لم تصل" صحيح البخاري

أنا خايف عليك تروحي تشربي من حوض رسول الله - صلى الله عليه وسلم - يوم القيامة رسول الله يشوفك يقول لك ارجعي فتحجبي فإنك لم تتحجبي إنت كنت موهومة، إنت كان فيه ناس ضاحكين عليك ويقولوا لك إن اللي

إنتِ فيه ده حجاب وده أشد من التبرج! لو خسرتي حجابك فضل لك إيه من دينك؟ إيه اللي فضل من دينك أنا مش عارف أكلم مين؟

قولوا لي يا أمة محمد أكلم مين؟ قولي لي إنتِ أكلم مين؟ أكلم بنات ثانوي؟ ولا أكلم اللي لابسه حجاب ٢٠١٠؟ ولا أكلم اللي لابسه حجاب إستايل؟ ولا أكلم اللي لابسه حجاب روش؟ ولا أكلم اللي لابسه حجاب آخر صحيحة؟ ولا أكلم اللي لابسه تونيك وبنطلون وكعب ١١ سم وبارفان عاصف وماكياج عاصف والطرحة الصغيرة مدخلاها من جوه التونيك؟ ولا أكلم اللي لابسه طرحة مخرمة مثقوبة وبتقول إن هي إيشارب وحجاب، وبلوزة ضيقة، وبنطلون ضيق، وجسمها مفصّل والعياذ بالله وماشيه في الشارع وبتقول أنا محجبة!

ولا أكلم البنت اللي رابطة اسباناش ولا اللي حاطه ست طرح على بعض ألوان الطيف كلها ماشيه عامله زي الضفادع البشرية في الشارع، عامله زي الضفادع البشرية ألوان هدومها وألوان طرحها.

أكلم مين؟ أكلم مين؟ أكلم اللي لسّه كذا خطوة بينها وبين الحجاب الكامل؟ حجابها قريب بس لسّه لسّه فيه حاجات ناقصة قولوا لي أكلم مين يا جماعة؟ مين هي المتبرجة؟ ده السؤال اللي لازم ينطرح على كل البنات مين هي المتبرجة؟

كل دول متبرجات كل دول بينطبق عليهم نصوص التبرج في الدين، خدي بالك اللي هيبصّ للي كاشفه شعرها بسيئة، واللي هيبصّ للي حاطه اسباناش بنص سيئة؟ برضه بسيئة، برضه لو فتنني شباب المسلمين بنفس السيئة أكلم مين يا جماعة؟ ارجعي فتحجبي فإنك لم تتحجبي.

### أنا خايف عليك.. لازم تفوقي

لإنك غالية، لإنك غالية بأكلمك الليلة، لإنك غالية بأنصحك، لإنك غالية بأوجه ندائي لك، لإنك غالية بأصرخ فيك، لإنك غالية هناديكي كلنا وهنهز فيك لإنك غالية لإن رسول الله كان معرض دمه ودم الصحابه وأرواحهم للموت عشانك، عشان حجابك اللي أنا جاي بعد ١٤٠٠ سنة بأكلمك عليه، لأنك غالية خايف عليك من لحظة وزن الأعمال خايف عليك من لحظه وزن الأعمال إنتِ عارفه يا بنتي كل نازلة بتنزليها باللبس اللي إنتِ لابسه ده شكله إيه؟ أنا محجبة.. إنتِ لسه بتقولي أنا محجبة؟

مرات أبو جهل كانت ترضى تلبس تونيك؟ كان أبو جهل يقتلها، مرات أبو لهب كانت ممكن تلبس بنطلون وتقول ده فضفاض؟ ده كان أبو لهب عمل فيها إيه؟ والله مرات أبو جهل ومرات أبو لهب ما يرضوا ييسوا اللبس اللي بيتلبسه دلوقت في الشارع أنا عايزك تفوقي أنا عايز أهزك وأقول لك عشان إنتِ غالية، عشان إنك غالية خايف على لحظة وزن الأعمال.

**شوفي لو نزلتي هترجعي بكام سيئة؟**

لنزلتي باللبس بتاعك ده إنت عارفه إنت راجعه بكام سيئة؟ نزلتي مشيتي في الشارع شارع لا طويل ولا قصير، لا زحمة ولا فاضي فيه ٢٠٠، ٣٠٠ واحد ١٠٠ واحد بص لك كل واحد بصّة واحدة بس بـ ١٠٠ سيئة بسيطة ماشي، دخلتي الجامعة.. الجامعة ٥٠٠٠، ٦٠٠٠، ٢٠٠٠٠ شاب والجامعة بقى وشباب الجامعة كل واحد ١٠٠، ١٥٠ بصّة وهيصّ لك منهم ١٠٠٠ واحد بس آدي ١٥٠٠٠٠ بصّة بـ ١٥٠٠٠٠ سيئة.

بعد كده وقفتي مع الشلة بقى مع الجروب أربع خمس ولاد فيها كل واحد عينه عليك من أولها لآخرها مش عارف إن كل ده حرام، كل واحد بص لك ١٠٠٠ بصّة في الخمس أو ستّ ساعات من خمسة آدي ٥٠٠٠ سيئة، بعد كده ربنا رزقك وشاب عينه هيئة أرساد مسكك من فوقك لتحتك ربع ساعة ده لوحده والعياذ بالله ما اعرفش يتعد ازاي ده!؟

بعد كده وإنّ راجعه بيتك ركبت المترو آه ١٠٠٠ بصّة في لحظة واحدة بـ ١٠٠٠ سيئة بالليل وإنّ ماشيه في الشارع وما أدراك ما شباب الليل كل شاب بص لك ١٠ بصّات بس مش ٢٠ بصّة.. بكام؟ إنت عارفه النازلة الواحدة اللي إنت نزلتها إنت راجعة منها بكام سيئة؟ إنت عارفه النازلة الواحدة يا أم اسبانش ياللي لابسه طرحه مخرّمة، ياللي عامله ٦ طرح على بعض، ياللي لابسه بادي واسترتش، ياللي لابسه شيميز، ياللي كاشفه شعرك، ياللي عامله موزميلييه، إنت عارفه إنت راجعه بكام سيئة؟ وكل ده في نازلة واحدة اضربي في ٥ سنين بقالك ٥ سنين متبرجة ولسه الله أعلم لسه أد إيه؟ ربنا يهدينا جميعًا يارب اللهم آمين.

لسه.. إنت فاكهه دي بس السيئات؟ ده لسه! إنت وقفتي ساعتين قدام المراية الميك آب واللبس وعدلة الطرحة وتنزيلة القصة، كل ده ساعتين قدام المراية ربنا ناظر ليك ساعتين ماخفتيش من نظرة غضب من الله سبحانه وتعالى وإنّ بتعملي كل ده؟ وناويه تنزلي تفتني شباب المسلمين.

**كل ده في ميزانك**

نزلتي يا مصيبتاه.. إنت عارفه حصل إيه لما نزلتي؟ شاب شافك كان ملتزم لما شافك إنتكس.. في ميزانك، بنت صغيرة في إعدادي شافتك قالت أنا عايزة أبقى زيك البنات تبصّ لي.. تبرجها طول عمرها في ميزانك، بنت كانت لسه لابسه حجاب جديد وتائية إلى الله شافت الناس بتبصّ لك فتنت بيك خلعت الحجاب.. تبرجها طول عمرها في ميزانك، شارون ولا بوش شافوكي في التلفزيون شمتوا في الإسلام إن البنات بقوا كده.. شماتة أعداء الله في الإسلام في ميزانك، بنتك لما تتجوزي تقول الله يا ماما إنت كنت لابسه كده وإنّ صغيرة يا ماما أنا هاطلع زيك عشان أبقى كويسه زيك يا ماما.. تبرج بنتك طول عمرها في ميزانك.

وآه.. آه لو عدّيتي على شلة مباركة، شلة مباركة، واحد بصّ لك شهوته ثارت راح عمل عادة سرية.. في ميزانك، واحد بصّ لك راح زنى.. في ميزانك، واحد بصّ لك راح إتجوز عرفي.. في ميزانك، واحد بصّ لك راح سهر قدام

انت على مواقع قدرة.. في ميزانك، واحد بصّ لك نفسه افتتحت قعد يبص طول اليوم.. في ميزانك في ميزانك، شاب خارج من الجامع خاشع وخاضع بصّ لك الخشوع راح وقعد يومين بيعاني من الفتنة.. في ميزانك.

ده كل ده.. كل ده **وتخيلي ده في نزلة واحدة!** اضربي ده في كام سنة بقى إنت ماتعريفش تيجي يوم القيامة تلاقي في ميزانك ٥٠٠ واحدة منتكسة وقلعوا الحجاب.. أنا يارب؟! و ٣٠٠ بنت تبرجوا بسببك.. أنا يارب؟! و ٥٠٠ شاب انتكسوا بسببك.. أنا يارب؟! و ٣٠٠ شاب وقعوا في الزنا بسببك.. أنا يارب؟! كل ده كان في ميزانك وبسببك، كل ده لسه لسه ما هو اللي يبصّ للي كاشفه شعرها بسيئة واللي يبصّ للي طرحة وتمتكيجه وبارفان وماكياج وبدي واسترتش وتونيك وبنطلون وكعب ومانيكير وميك آب كامل كل الاتنين دول دي بسيئة ودي بسيئة يا جماعة.

غير دولاب هدومك، دولاب هدومك إنتى ناويه تلبسى فيه حاجة حاجة كل ده بالنية في ميزانك والعياذ بالله لأنك ناويه إنك تعصي ربنا بكل ده مبيته النية.

كل ده يا جماعة التبرج ده **عدّاد سيئات شغال ٢٤ ساعة التبرج ده جريمة والله العظيم جريمة ما هو مجرد معصية أو كبيرة من الكبائر إنت عارفه وإنت متبرجة كده كام عدّاد سيئات شغال؟** على طول عدّاد النظر الحرام للي يبصّ لك، عدّاد التبرج والفتنة، عدّاد تضيع المسلمين وواحدة هتتأثر بيك أو واحد، عداد الميك آب والماكياج، عدّاد البارفان، عدّاد النمص، كل دي عدّادات شغاله، كل دي في ميزانك.

### ليه تخسري بيتك في الجنة؟

أنا خايف عليك لأنك غالية، مش عايزك تندمي لأنك غالية، مش عايزك تبكي يوم القيامة على الميزان. إنما بقى يا جماعة الجنة لأنك غالية مش عايز الجنة تضيع منك، الرسول - عليه الصلاة والسلام - يقول على المتبرجات "لا يدخلن الجنة ولا يجدن ريحها" صحيح مسلم

أنا خايف عليك، خايف عليك إن الجنة تتحرّم عليك فعلاً بسبب التبرج فوقي مافيش حاجة تستاهل مافيش حاجة تستاهل إنك تخسري الجنة لو إنت لبستي حجاب أمهات المؤمنين ومشيتي في الشارع تخيلي بنت صغيرة شافتك قالت هتقلّدك.. في ميزانك، صاحبتك قالت هتقلّدك.. في ميزان حسناتك، شاب شافك مااتفتنش.. برضه في ميزان حسناتك، في ميزان حسناتك إنك حفظتيه من الفتنة.

تخيلي واحدة لابسه حجاب جديد شافتك ثبتت.. في ميزانك، شارون شافك قلبه اتحرق.. في ميزانك، بنتك الصغيرة قالت هابقي زيك يا ماما.. في ميزانك، كل ده في ميزانك، كل ده حسنات.

إنما الجنة كده ممكن تضيع منك يا بنتي، إنت ربنا باني لك بيت في الجنة وبيت في النار ربنا يعافينا يارب هتدخلني إيه فيهم؟ هتخسري بيت الجنة وتاخده مكانك واحدة عفيفة وطاهرة ومحجبة ومتحجبة عن الرجال، **ليه تخسريه؟** ليه تخسري جمالك الرهيب اللي هيبقى ليك في الجنة؟ جمالك في الجنة هيبقى أعظم من جمال الحور العين،

ريقك في الجنة لو تَفَلَّتِي في البحر يخليه عذب، عينيكِ ربنا سَمَّاهَا الحور العين من شدة جمال عينك، شعركِ "لَتَصِفُهَا عَلَى رَأْسِهَا" صحيح البخاري وإنتِ لابسه خمارك في الجنة خير من الدنيا وما فيها، أمال لَمَّا تكشفِي خمارك زوجك قوته وجماله وشبابه ووجهه ليك بتخسري بتخسري كل ده ليه؟!!

لأنك غالية مش عايزك تخسري، لأنك غالية مش عايزك تتعرضي لسوء الخاتمة، لأنك غالية مش عايزك تتعرضي للموقف ده.

أحد إخواننا وهو ماشي على الطريق السريع وهو كان رايح على الطريق السريع بعدها سبحان الله واحد معدي ماشي بعربية تيجي عربية نقل تخبط العربية هو رابط الحزام ولكن يعني البنت اللي راكبة جانبه المتبرجة تطير من شباك العربية تطير من الشباك تروح على الرصيف الثاني بقوة الخبطة تيجي عربية تانية تخبطها، صاحبي لَمَّا جرى وشاف المنظر بيوصف لي منظر جسمها مش منظر البنطلون والماكياج والدم اللي مع البارفان ومع الماكياج بيوصف لي منظر الكعب العالي وهو بييجري يلم من كل حته بيوصف لي منظر أجزاء جسمها وهو بيلمها دي ماتت دي هتيجي تمسك في رقبت كل راجل كان في عيلتها، كل داعية كان في بلدها إنتو ماوعظتونيش ليه؟! إنتو مانصحتونيش ليه؟! إنتو سبتوني أموت كده ليه؟! إنتو سبتوني أقابل ربنا كده ليه؟! ليه؟

### اوعي تقابلي ربنا كده

أنا خايف عليكِ إنتِ لأنك غالية مش عايزك تقابلي ربنا كده، مش عايزك تقابلي ربنا كده اسمعي حديث رسول الله صلى الله عليه وسلم "إن الميت يبعث في ثيابه التي يموت فيها" صححه الألباني يعني إيه؟ يعني اللي ماتت على ثياب متبرجة تُحشر بيها تدخلِي تُعرضي على الله بالثياب دي إزاي؟! تدخلِي تُعرضي على الله بالتونيك وباللبس الضيق وبالكعب وبالماكياج تدخلِي تُعرضي على الله إزاي باللبس ده؟! تقدرِي تقدرِي تستحملي الموقف ده؟

لأنك غالية مش عايز رسول الله يكرهك، مش عايز رسول الله يقول لك على الحوض "سَحَقًا سَحَقًا" صحيح البخاري وإنتِ عطشانه يوم القيامة، لأنك غالية مش عايزك تدخلِي على الرسول - عليه الصلاة والسلام - يقول لك "سَحَقًا سَحَقًا" ليه يا رسول الله؟ إيه اللبس اللي إنتِ لابسه ده؟! إيه ده؟ أنا عشت حياتي عشان أنقذك، أنا عشت حياتي عشان إنتِ تبقي عفيفة، أنا ضحيت بكل حاجة والصحابة ضحوا بكل حاجة وقبورهم اتوزعت في الأرض عشان إنتِ تطلعي طاهرة وعفيفة وعارفة ربنا إيه اللي إنتِ فيه ده؟!!

إزاي.. إزاي قبلتِ إنك تحاربي الدين أشد من شارون، هو كان ييموت المسلمين إنتِ كنتِ بتفتنيهم، شارون كان بيضيع دينهم، إنتِ كنتِ بتضيي آخرتهم، إزاي قبلتِ تبقي طعنة في قلب دينك؟! إزاي قبلتِ تبقي قبلة تنفجر في كبد دينك؟! إزاي قبلتِ إنهم يستخدموك ضد دينك، إزاي إنتِ عارفه الرسول - عليه الصلاة والسلام - وصف المتبرجة بإيه؟! وصف المتبرجة يا جماعة التبرج بتاع زمان مش زي دلوقت خالص.

ربنا يقول **"وَلَا تَبْرَحْنَ تَبْرُجَ الْجَاهِلِيَّةِ الْأُولَى"** الأحزاب: ٣٣

كان تبرج الجاهلية الأولى إيه؟ كانت المرأة تلبس الطرحة وتبين حته من شعرها، وتنزل الطرحة فتبين حته من رقبتها وهي ماشيه في الشارع، ده تبرج الجاهلية.

يعني مرات أبو جهل ما كانتش بتلبس تونيك، ولا مرات أبو لهب كانت بتلبس بنطلون، ولا كانوا يمشوا في الشارع بيرفانات ولا كانوا يمشوا بالميك آب الكامل في الشارع، ولا كانوا يقدرُوا يعملوا كده، ولا كانوا يرضوا يعملوه، ولا كانوا يرضوا يعملوه الرسول - عليه الصلاة والسلام - أنا مش عايز أوصاف الرسول للمتبرجات تنطبق عليكِ الرسول - عليه الصلاة والسلام - بيوصف المتبرجة بإنها ملعونة.

**وصف الرسول - صلى الله عليه وسلم - للمتبرجة**

إنتِ عايزه تبقي كده؟! الرسول - عليه الصلاة والسلام - بيوصف المتبرجة بأنها من **أهل النار**، الرسول - عليه الصلاة والسلام - بيوصف المتبرجة إنها **محرومة من الجنة**، الرسول - عليه الصلاة والسلام - بيوصف المتبرجة إنها **منافقة**، الرسول - عليه الصلاة والسلام - بيوصف المتبرجة **بأن لا تُقبل لها صلاة**، الرسول - عليه الصلاة والسلام - بيوصف المتبرجة **بأن هي ترتكب كبيرة من الكبائر زي السرقة والقتل والزنى**، الرسول - عليه الصلاة والسلام - بيوصف المتبرجة **بأنها مجرمة الكلام** ده إنتِ جيته منين؟

الرسول ما وصفش ذنب زي الذنب ده، الرسول ما قالش على معصية اللي قاله على الكبيرة دي أنا عايزك تفوقى لأنك غالية مش عايزك تضعي عشان ما تندميش.

اسمعي حديث رسول الله صلى الله عليه وسلم **"صنفان من أهل النار لم أرهما: قوم معهم سياط كأذناب البقر يضربون بها الناس، ونساء كاسيات، عاريات، مميلات، مائلات رؤوسهن كأسنمة البخت المائلة لا يدخلن الجنة ولا يجدن ريحها، وإن ريحها لتوجد من مسيرة كذا وكذا"** صحيح مسلم

من أهل النار والعياذ بالله، الرسول ذكر منهم **"ونساء كاسيات"** يعني لابسين يا رسول الله ده فيه طرحة على راسها يا رسول الله، ده فيه بنطلون وبادي وكل حاجة يا رسول الله، لابسه أهه يعني **"ونساء كاسيات"** يعني لابسه بس **"عاريات"** الحقيقة إنهم مش لابسين، الحقيقة إن جسمهم كله متفصل، الحقيقة إنهم بارزين كل فتنة في جسمهم **"ونساء كاسيات عاريات مميلات مائلات"** تتكلم مع ده وتبتسم لده وتضحك مع ده.

**"لا يدخلن الجنة ولا يجدن ريحها"** حتى ما تشم ريحة الجنة أنا خايف تتحرمي من الجنة أنا خايف تبقي من أهل النار عشان ما تندميش.

الرسول - عليه الصلاة والسلام - شوفي بيوصف المتبرجة بإيه **"يكون في آخر أمّتي رجال يركبون على سروج كأشباه الرجال"** اللي هي زي العريبات كده دلوقت، **"ينزلون على أبواب المساجد"** يركن عربيته قدام المسجد في

التراويح وينزل يصلي "نساؤهم" وهو نازل يصلي في الجامع أخته وبنته ومراته شكلهم إيه؟! "نساؤهم كاسيات عاريات على رؤسهن كأسنمة البخت العجاف" اللي عاملينه في شعرهم، اسمعي "العنوهنّ فإنهنّ ملعونات" حسنه الألباني ملعونة يعني مطرودة من رحمة ربنا، يعني مافيش رحمة لا في الدنيا ولا في الآخرة، ترضي تبقي كده ليه؟! اسمعي عشان تفوق، الرسول بيوصف المتبرجة بإنها بتقع والعياذ بالله في ذنب زي الزني "أيما امرأة استعطرت ثم مرت على قوم ليجدوا ريحها" فوجدوا ريحها حتى مزيل العرق ميقاش مزيل عرق بريحه يبقى مزيل عرق أودرلس موجود في السوق وموجود في كل حته "ليجدوا ريحها فهي زانية" صححه الألباني مصدقه كلام حبيب الله؟ مصدقة كلام رسول الله؟ رسول الله بيحذرك، رسول الله لأنك غالية عنده بيحذرك هو عارف إن الكلام ده لَمَّا يطلع من بقه هيخوفك وهيخليك تمشي ورا طريق ربنا سبحانه وتعالى.

شوفي الرسول، ترضي إن الرسول يوصفك بالوصف ده "أيما امرأة تطيبت ثم خرجت إلى المسجد" يا رسول الله دي خارجه المسجد دي خارجه لبيت الله بس حاطه البارفان اللي كل البنات بيحطوه دلوقت اللي بيخنق الأنوف في كل مكان، "لم تقبل لها صلاة حتى تغتسل" صححه الألباني تستحمي وتزيل آثار البارفان يعني الرسول ترضي إن الرسول يوصف إن صلاتك مش مقبولة؟ ترضي عشان إيه وليه؟

إنتِ غالية ما ترخصيش نفسك، إنتِ غالية ما تضيّعيش نفسك، إنتِ غالية ربنا أعلى حاجة عندك في حياتك، قال الله يبقى سمعنا وأطعنا، إنتِ غالية وبيقيناً هتسمعي كلام رسول الله - صلى الله عليه وسلم - . اسمعي حديث رسول الله صلى الله عليه وسلم "وشر نساءكم المتبرجات المتخيلات وهن المنافقات" صححه الألباني الرسول يوصفك إنك منافقة وتسكتي! لا يمكن.

اسمعي لَمَّا جت أميمة بنت رقيقة تباع رسول الله - صلى الله عليه وسلم - "فقال: أبايعك على أن لا تشركي بالله شيئاً، ولا تسرقني، ولا تزني، ولا تقتلي ولدك، ولا تأتي بهتان تفتريه بين يديك ورجليك، ولا تنوحني، ولا تبرجي تبرج الجاهلية الأولى" حسنه الألباني

الرسول وهو بيقول لها ما تزنيش وما تقتليش قال لها ما تبرجيش، الرسول قرن الكبائر دي كلها مع بعض يعني معصية رهيبه ده أَلْف باء الإسلام يا بنتي أَلْف باء الإسلام، لو حجابك ضاع.. بقى من دينك إيه؟ لو بقيتي فتنة.. بقى من دينك إيه؟! لبسك اللي إنتِ لابساه اقفي قدام المراية دلوقت ده يارب يقربني منك ولا يباعدني عنك؟ ده بيكتبه ملك اليمين ولا ملك الشمال؟ ده يخليني آخذ صحفتي باليمين ولا بالشمال؟ ده يرضيك عليّ ولا يفضبك عليّ يارب؟

اقفي وواجهي نفسك يا أختي لأنك غالية، لأنك غالية خايف عليكي يوم القيامة قوي، خايف على كل أخت مسلمة وكل بنت مسلمة يوم القيامة قوي قوي.

أحد الشباب والحمد لله أحواله اتغيرت دلوقت رأى رؤية يقول شاف إن هو مات وإن هم بيغسلوه وييدفونوه ويكفونوه وإن هو مش قادر يقول لهم إن هو ما ماتش، دفنوه وسوه يقول استسلمت في القبر إن أنا خلاص ميت بأبص حوالى لقيت جماجم وميتين شويه وجه منكر ونكير، يقول كده في الرؤيا ده أخ أعرفه أنا بنفسى يقول كده في الرؤيا يقول جه منكر ونكير قعدوه يسألوه، يسألوني يسألوني لحد ما قلت يااه ده أنا نفسى أرجع الدنيا تاني وأقول للناس كلها إنك لو رمشت بعينك رمشة هتسأل عليها في القبر يقول سيوني وشوية لقيت راجل معاه زي مرزبه، زي مقمع وفضل يجري ورايا وأنا أجري ويجري وأنا أجري وصحى مفزوع على منظره وهو بييجري، بيهرب من هذه المرزبه يا جماعة رمشة عينك هتسألك عليها، رمشة عينك هتسألك عليها، فوقى.

### عايزين نبقى من أهل الجنة

لما الرسول - عليه الصلاة والسلام - يقول "العنوهن فإنهن ملعونات" حسنه الألباني عارفه يعني إيه "العنوهن"؟ يعني مطرودات من رحمة الله، يعني إيه؟ يعني يوم القيامة هتموتي من العطش تجري على حوض رسول الله - صلى الله عليه وسلم - عايزه تشربي.. تنطردى ليه؟ مافيش رحمة؟ مافيش رحمة؟ يوم القيامة هتموتي من الحر تجري على ظل عرش الله عايزه تقفى في الظل.. تنطردى ليه مافيش رحمة؟

لأ يا بنتي عايزين نبقى من أهل الجنة، يا أختي في الله يا غالية، يا غالية عند ربنا، المحجبة ما تعرفيش غالية عند ربنا أد إيه؟ آه لو تعرفي لو انتقتي واتحجبتى ليك عند ربنا إيه؟ مش عايزه تمشي في قافلة الطاهرات ليه؟ مش عايزه قصور الجنة بتاعة العفيفات ليه؟ مش عايزه نعيم الجنة بتاع المحجبات ليه؟ مش عايزه تنامي وربنا راضي عنك ليه؟ مش عايزه تمشي في سرب الطائعين ليه؟ لأنك غالية لأنك غالية يا أختي في الله لأنك غالية بأحدرك، لأنك غالية بأناديكى، مش عايزك تتعرضي لما في القبور، لعذاب القبور.

إنت هستنقى هستنقى لو ماتت المرأة المتبرجة هيلفوها في خمس، ست أثواب وتنزل تتكفن فيهم تحت في التراب يعني هتدخل القبر منتقبة منتقبة، هتدخل مافيش في جيب علبه ماكياج ولا في جيب علبه بارفان، طيب وأنا هأحتاج الماكياج والبارفان ليه؟

لأن بعد أيام هتبدأ ريحة الجسم تبقى لا تطاق وتبدأ العينين الجميلة تنفجر والميه بتاعتها تسيل على الوجنتين، وتبدأ الشفايف تنفخ، وتبدأ الأسنان اللي كانت الضحكة بتاعتها ضحكة ساحرة تقع، وتبدأ الرموش اللي كان عليها الآيلينر والحواجب اللي اتمصت تقع، ويبدأ الشعر اللي اتسغ واتفرد وطار مع الريح يبدأ ينزل ويتساقط ويقع، وتبدأ الخدود اللي كان بينحط عليها الميك آب كله تبدأ تنفجر وتتحلل ويبدأ الجسم اللي ليس البدي والاسترتش ومشى يفتن المسلمين.. الدود ياكل في كل حته فيه.

وتبدأ كل حاجة فتنني بيها المسلمين إنت متخيلة ساعتها اللي كانوا بيحروا وراكي لو شافوكي ساعتها هيعملوا إيه؟! إنت نفسك يا بنتي الجسم ده كله مالوش قيمة، إحنا قيمتنا في أرواحنا، قيمتنا في إرضاء الله، أكثر ناس بتحبك

مش هتقف على القبر ساعتها نص ساعة وهيسوكي لوحذك تواجهي كل السيئات اللي إنت عملتها بسبب التبرج، تواجهي التهمة بكل الأحكام اللي رسول الله - صلى الله عليه وسلم - قالها عليك. لأنك غالبية مش عايزك تندمي، لأنك غالبية مش عايزك تخسري، لأنك غالبية أنا خايف عليك من الصراط.

يا بنتي إنت أكثر واحدة لازم تحسبها الرسول - عليه الصلاة والسلام - قال "وأطلعت في النار فرأيت أكثر أهلها النساء" صحيح البخاري يعني أكثر ناس في النار، يبقى النساء بالذات لازم يحسبونها لازم علشان إيه؟ علشان إيه بتعملي كده؟ علشان دنيا ربنا قال عليها "وَمَا الْحَيَاةُ الدُّنْيَا إِلَّا مَتَاعُ الْغُرُورِ" آل عمران: ١٨٥  
علشان دنيا رسول الله - صلى الله عليه وسلم - قال عليها "مالي وللدنيا، ما أنا في الدنيا إلا كراكب استظل تحت شجرة، ثم راح وتركها" صححه الألباني

### جزاء المتبرجة في النار

الرسول يقول "صنفان من أهل النار" منهم "نساء كاسيات عاريات" صحيح مسلم عارفة يعني إيه أهل النار أهل البيت اللي ساكنين فيه سنين مش يوم وليلة، يعني المتبرجات هيدخلوا النار سنين والعياذ بالله، يدخلوا جهنم سنين، أهل البيت اللي دخلوا كل أوض البيت يقفوا أهل مش ضيوف يقعدوا في أوضة واحدة، المتبرجات هيتعدبوا بكل عذاب جهنم والعياذ بالله.

"قُطِّعَتْ لَهُمْ ثِيَابٌ مِّنْ نَّارٍ" زي ثياب التبرج الضيقة اللي كانوا يلبسوها "يُصَبُّ مِنْ فَوْقِ رُؤُوسِهِمُ الْحَمِيمُ" الرؤوس اللي كانوا يبسغوها ويبينوها والقصاص اللي كانوا بيتزلوها حتى من تحت الطرحة "يُصَهَّرُ بِهِ مَا فِي بُطُونِهِمْ وَالْجُلُودُ" الحج ١٩: ٢٠ الجلود اللي كانوا بيكشفوها والأجسام اللي كانوا بيكشفوها جزاء من جنس العمل.  
يا بنت الحلال هي النار الأكبر ولا الجنة؟

يا جماعة الجنة عرضها السماوات والأرض، النار ضيقة بس حجم اللي بيتعذب في النار أكبر ولا حجم المؤمن؟ ده حجم اللي بيتعذب في النار ضرره أذ جبل أحد يعني حجم رهيب، طيب عدد اللي بيدخلوا النار أكثر ولا الجنة؟ اللي بيدخلوا النار ٩٩٩ من كل ١٠٠٠ يعني النار دي مكان ضيق والأعداد فيها رهيبية والأحجام كبيرة يعني حر قاتل، يعني عذاب قاتل، ليه تعرضي نفسك لكده؟ أنا مش عاوز أقول لك إزاي تبرجي؟ أنا عاوز أقول لك إزاي تجزئي إنك تبرجي وإنت عارفة؟! إزاي تجزئي إنك تكشفي جسمك؟ إزاي تجزئي إن شيء من جسمك بيان؟

أدخلي المطبخ وإنت بتتمكيجي وحطي المرايا على البتوجاز وحطي صابغ في الشواية وشوفي هتقدري تتمكيجي ولا لا، أما علمتي أن طعام أهل النار نار؟ أما علمتي أن شراب أهل النار نار؟ أما علمتي أن فراش أهل النار نار؟ أما علمتي أن ثياب أهل النار نار؟ أما علمتي أن غطاء أهل النار نار؟ إزاي تجزئي تعصيه!؟

إزاي تجرئي تعارضيه؟! إزاي تجرئي تتمردى على حكم ربنا ومولاك؟!!

### خايف عليكِ تتحرمى من نعيم الدنيا قبل الآخرة

لإنك غالية، لإنك غالية بأناديكى، بأناديكى خايف عليكِ فى الدنيا قبل الآخرة، خايف عليكِ فى دنيتك قبل آخرتك، خايف عليكِ هتتحرمى الزواج، العنوسة دلوقت بسبب التبرج لأنك فاكهه إنك هتاخدى العريس بمعصية ربنا فتتحرم الستات من العريس والبنات من العرسان، خايف عليكِ تتحرمى من الأولاد بسبب التبرج، خايف عليكِ تتحرمى من السعادة بسبب التبرج، خايف عليكِ تتحرمى من إجابة الدعاء بسبب التبرج خايف عليكِ.  
بنت من البنات ربنا يغفرنا جميعاً ويرحمنا بنت صغيرة ومحبوبة والكل يتمنى بصّة ويبجي لها سرطان فى الثدى كانت بتقول قبل ما تموت الله يرحمها ويعني تابت توبة إن شاء الله إن شاء الله صادقة، بتقول أنا عارفة السرطان ده حصل ليه لأنى كنت بأتعمد ألبس لبس ضيق بيرز مفاتنى فرينا سبحانه وتعالى أراد إنه يطهرنى من الذنوب دي بهذا المرض ربنا يجعل أمراضنا كلها كفارة لينا وطهارة لينا، وتطهير لينا من الذنوب.

لأنك غالية أنا عايزك ما تتسبقيش، أنا عايزك ما تتأخريش أنا عايزك تاخدى مكانك يا بنتى يا أول نبض، يا أول قلب نبض بلا إله إلا الله بعد قلب الرسول يا غالية مترخصيش نفسك.  
شوفى المرأة اللي كانت فى عبارة السلام إكسرس قبل ما تغرق وهي بتغرق وكانت منتقبة وفجأة السفينة بتغرق، جوزها بيقول لها يلا نطلع على السفينة بسرعة نشوف طوق نجاة هتموتى، عايزه تطلع بسرعة على الأوضة بتاعتها تجيب نقابها، نقاب إيه هتموتى! هتموتى مش هتلهقى تجيبى النقاب، تقول له إلا نقابى إلا نقابى، أموت وأنا منقبة وقابل ربنا وأنا منقبة.

تمسكت بنقابها لآخر لحظة فى حياتها، تمسكت بنقابها، إلا نقابى، فىن كلمتك.. إلا حجابى؟!  
النقاب ده الجنة بتاعتك، نقابك ده جنتك، حجابك ده جنتك، عدم اختلاطك ده جنتك، يا بنتى أنا بأدعوكى للجنة، أبواب الجنة المفتوحة هتتحرمى منها ليه؟ بسبب حجابك إنت مش عاوزة ربنا؟! إنت مش عاوزة مريم؟!  
مريم العفيفة الطاهرة، ربنا نزل سورة باسمها علشان عفتها وطهارتها إنت رمز الطهارة فى المجتمع.

صونى جمالك فى علاك.. عرف الطهارة من رآك، ده إنت رمز الطهارة ده إنت اللي بفتخر بطهارتك، ده إنت اللي قدام الدنيا رافعين راسنا لإنك الطاهرة العفيفة، نساءنا عفيفات أهم بنفرح بيبك إنت ماتعرفيش يا كل منقبة قلوب الملتزمين بترقص لَمَا يشفوكى ماشية فى الشارع زي الملكة ويشوفوا دين ربنا بيرجع تانى.

صونى جمالك فى علاك عرف الطهارة من رآك

سيري على مهل ولا تتعثرى خلف الشباك

ارجعى لمجدك، ارجعى لعزك، ارجعى لحيائك.

## ليه تكوني سهم في قلب الإسلام؟

الغرب لما فشل في ضرب المسلمين بالقنابل قال خلاص لا يهدم الإسلام إلا كأس وغانية، طيب الخمرة والمخدرات هصدّره لهم، طيب الغانية ما ينفعش نصدرها، مافيش حل غير المسلمة هي اللي تبقى غانية، طيب المسلمة الطاهرة العفيفة تبقى غانية إزاي؟! هستدركها واحدة واحدة.. هنخرجها من بيتها، هنبداً الأول نخلعها النقاب، شوية نرفع الفستان شوية، شوية نكشف الذراع شوية، شوية على ١٩٤٠ كانت نساء مصر للأسف التبرج هو النسبة الكاسحة في نساء مصر للأسف ضحكوا عليك، ترضي إنك تبقي سهم في قلب الإسلام؟! ترضي إنك تبقي سهم في كبد الإسلام؟!

يا غالية إنت عارفه شمس البارودي ربنا يتقبل توبتها لما أول مرة لبست حجاب الله الله على إحساسك وإنت أول مرة تلبسي نقاب، الله على إحساسك وإنت أول مرة تلبسي الخمار، الله على إحساسك وإنت أول مرّه تحسي إنك متغطية وعفيفة ومافيش أي حاجة باينه مننك علشان ربنا، الله على إحساسك وإنت لابسة لبس أمهات المؤمنين، الله على إحساسك وإنت حاسة إنك ملكة، ملائكة السماء بيزفوكي، الله على إحساسك وإنت حاسة إنك طيارة خلاص ماعدتش ماشية على الأرض، الله على إحساسك ساعتها.

شمس البارودي أول مرة لبست حجاب وبتطوف حوالين الكعبة وقاعدة تبكي وتقول **فليقولوا عن حجابي** يقولوا اللي يقولوه، اللي بينتقد ينتقد، اللي يقول يقول، **لا وربي لن أبالي** أنا مش هأبالي من الكلام اللي هيقوله عليّ جوزي ولّا خطيبي ولّا صاحباتي ولّا سخرية المجتمع **قد حماني فيه ربي** ده حمايتي وحصني **وحباني بالجلال** ده أنا ملكة ماشية متوّجة، ده إنت ملكة، ده منظر النقاب والخمار منظر ملكة والأخت ماشية حتى إديها لابسه فيها جونتي والله منظر ملكي يا أختي في الله، ملكة ماشية على الأرض إحنا عندنا ملايين الملكات اللي هم ملايين المنقبات المتحجبات العفيفات.

عارفه لما أم سلمه دخلت على النبي - عليه الصلاة والسلام - قالت له يا رسول الله الرجال يدينن أثوبهم إلى الكعبين يعني الرجل بيلبس الجلابية فوق الكعبين طيب يا رسول الله إحنا نعمل إيه؟ الرسول قال لها **"يرخين شبرًا"** صححه الألباني نزلي كمان شبر كمان شبر بعد كعب الرّجلين ده يعني على الأرض قالت له يا رسول الله كده تنكشف أقدامنا إذا تنكشف أقدامنا أم سلمة خائفة إن مشط رجليها بيان، مشط رجليها ياللي مبيينة كل حاجة في **جسمك**.

يا مسلمة يا عفيفة أم سلمة خائفة إن لما تقعد الثوب يترفع مشط الرّجلين بيان، شايفين العفاف والطهارة والنقاء، شايفين يا جماعة لما السيدة عائشة بتقول يرحم الله نساء الأنصار لما نزلت آية الحجاب ماطلعش علمانيات قدرات وقعدوا يقنعوا البنات إن آيات الحجاب ما بتدعوش للحجاب إنتو اللي جاين تفهمونا ديننا! - حسبنا الله حسبنا الله - شققنا مُرتهن، جابوا الثوب بتاعهم كل واحدة عندها ثوبين شقت ثوب منهم نصين بقى ثوب هدوم والثوب الثاني طرحتين ولّفتهن ولبسوا النقاب فورًا، فورًا سمعوا كلام ربنا مافيش واحدة قالت طيب والماكياج ومين

اللي يخطبني ومين اللي يتقدم لي والشباب يعرفوني إزاي؟ وأنا مش عايزه أتجوز جواز صالونات، أنا عايزه أتجوز جواز على حب وأبقى دراسة جوزي قبل ما أتجوزه، طيب وأنا خطيبي لو رفض طيب وأمي معارضاني وأبوي..  
والله ما حد معارضك إنت لو عايزه هتلبسه ولا حد هيقف في وشك إنت لو دخلت على أبوك وأمك دلوقت قلتهم أنا جالي شركة عشرة آلاف جنيه في الشهر ولكن شرطهم، الموديل بتاعهم، اليوني فورم بتاعهم نقاب هيقولوا لك إيه؟ انزلي يا بنتي هاتيلك عشرين نقاب عشان الدنيا، طيب عشان ربنا عشان ربنا سبحانه وتعالى؟ مافيش واحدة من الأنصار قالت وأنا هأعمل إيه؟ وليلة العمر وعايزه أعيش ليلة العمر طيب بعد ليلة العمر مافيش واحدة أمها قالت لا ما تدفينيش نفسك كله نفذ.

### توبي قبل فوات الأوان

بنت من البنات اتصلت على رقم افتح لي قلبك من يومين وشغالة موديل، موديل يعني في الكليبات وعرض الأزياء وسبحان الله سبحان الهادي بأقول لكم يا جماعة الأيام دي شباب كثير بيتوب وبنات كثير بتتوب بفضل الله.  
يعني اتكلمت على الرقم فقالت أنا عايزه ألبس حجاب أعمل إيه؟ فبعد شويه اتصلت تاني أنا ماعنديش هدوم أنفع أنزل بيها أصلاً أنا تبت خلاص ما قدرش أنزل بالهدوم اللي عندي دي ماعنديش، ليست إسدال الصلاة وركبت عربيتهم ونزلت اشترت حجاب اشترت أول حجاب تلبسه في حياتها، ألف مبروك حمدًا لله على السلامة يا بنتي.

يا بنتي يا بنتي الحقي قبل ما القطر يفوت الحقي قبل ما قطر التوبة يفوت، فرعون وهو ييموت وسيدنا جبريل يقول لسيدنا محمد لو رأيتني يا محمد وأنا أضع الطين في فمه مخافة أن تدركه الرحمة.. ليه؟! جه يتوب إمتي؟ بعد ما القطر فات.

المرأة اللي كان بيجيلها صرع لما دخلت على النبي - عليه الصلاة والسلام - وقالت له يا رسول الله إني أصرع وأتى أتكشف يا رسول الله الرسول - عليه الصلاة والسلام - قال لها " إن شئت صبرت ولك الجنة ، وإن شئت دعوت الله أن يعافيك " صحيح البخاري قالت له طيب أنا بأتكشف يا رسول الله يعني إيه يعني أنا أصبر على المرض بس ما أصبرش على التكشف أنا أصبر على الصرع اللي فيه عض أسنان ونزيف من اللسان وتشنجات في الجسم وما أصبرش على إن حاجة مني تبان.. فين عفافنا يا جماعة!؟

إنت حفيدة العفيفات دول، ليه إنت مش زيهم ليه إنت مش عايزه تبقي معاهم في الجنة ليه!! ليه يا جماعة؟ واحدة هتقول لي أنا عارف خدي بالك الشيطان هيجيلك دلوقت، الشيطان هيجيلك هيقول لك خدي بالك استتي الماكياج إنت دلوقت مش متجوزه لسه مين اللي هبص لك وسط البنات المتمكجة دول لازم ماكياج وهييجي دلوقت للي مخطوبة خطيبك هيشوفك من غير ماكياج وحمايك تلاقيك مش حلوه زي البنات يسبيك، وهييجي للمتجوزة يا بنتي جوزك يشوفك مش حلوة زي باقي البنات ليه أحسن يسبيك ولا يزهد فيك ليه يا بنتي؟ يا بنتي

"تعس الدينار وعبد الدرهم" صحيح البخاري

تعست عبدة الماكياج، الماكياج اللي هيجوزني والماكياج اللي هيجبب جوزي في والماكياج اللي هيجليني بنت استايل والماكياج اللي هيجلي لي وضع في المجتمع، لأ ذلك من الله، الله اللي هيسعدك، الله اللي هيملي قلب جوزك رضا عنك.

والله أنا شفتها لأن أنا عارف إن كتير قوي منكم إجوازهم معدبينهم واجوازهم مقطعينهم، أنا بأتكلم بصراحة أول ما جوزك هيلتزم والله هتعيشي الجنة في الدنيا، اللي متجوزه ملتزم دي عايشه في الجنة يا جماعة.  
يا بنتي البسي نقابك عشان جوزك يلتزم هتعيشي الجنة والله العظيم في الدنيا فيالدنيا إنما الشيطان يجيلك مين الشاب اللي هيتجوزك؟

### فكر الشاب عند اختيار زوجته

أقول لك فكر الشباب بصراحة، فكر الشباب العادي الغير ملتزم مجموعة بنات كانوا داخلين سكشن في كلية في كلية الطب وولد ماشي وراهم فسمعهم يقولوا واحد صاحبهم اتجوز وعازمهم على فرحه يقولوا يفضلوا يمشوا معنا ويتكلموا معنا وكل حاجة وفي الآخر يروحوا يتجوزوا برّانا! لأنه مش هيتجوزك إنت أصلاً، الولد اللي كان قاعد مع بنت في النادي ويتقول له مواصفات اللي هتجوزها إيه؟ قال لها لا يمكن أتجوز بنت من النادي كانت هتجنن وهو يقول لها كده تتجنني ليه إنت فكرك إيه؟ إنت لو تبرجتي هو هيمشي معاكي شويه أيام الجامعة هيتسلي هيسلي نفسه وخلص إنما لما هيتجوز مش هيفكر فيك أبداً.

والشباب المتدين الشباب المتدين لا يمكن لو حطيتي ماكياج لا يمكن هيتجوزك، لا يمكن، ولا حتى ماكياج خفيف، الله! طيب ما أنا ممكن يجيلي واحد مش متدين ويتجوزني، يا بنتي اللي مش متدين عقبات ذنوبهم نزلت عليهم وافتقروا وماعادوش بيتجوزوا، اللي معاهم فلوس عشان بتوع ربنا دلوقت المتدينين هم اللي بيتجوزوا هتجوزي مين بقي؟ وهتروحي فين؟ طيب ماكياج خفيف هأحط ماكياج خفيف، ماكياج خفيف!!

اسمعي قول الله " **وَالْقَوَاعِدُ مِنَ النِّسَاءِ** " اللي عندهم سبعين وثمانين سنة " **اللاتي لَا يَرْجُونَ نِكَاحًا فَلَيْسَ عَلَيْهِنَّ جُنَاحٌ أَنْ يَضَعْنَ ثِيَابَهُنَّ غَيْرَ مُتَبَرِّجَاتٍ بِزِينَةٍ** " النور: ٦٠

يعني اللي عندها ثمانين سنة آه ممكن تتخفف من ثيابها بس من غير ماكياج، من غير زينة يانهار أبيض ربنا حرّمه على اللي عندها ثمانين سنة قدام الناس وهيجلله لك إنت!

الحقي قبل ما الشيطان يرجع عليك، الحقي قبل ما شوية الحماس اللي جوّه قلبك يروحوا، قومي على هدومك قومي على هدومك تاخريها دولابك من النهارده هيملي لبس عفيف، من النهارده هيملي لبس أم سلمه وعائشة وفاطمة وخديجة، من النهارده هتبدئي صفحة جديدة، من النهارده هتبعي ملكة، من النهارده بأقول لك حمد لله على

السلامة يا بنتي ما تقوليش الماكياج، الكحل مش هيغير اسم اتكتب من خمسين ألف سنة، البارفان مش هيغير اسم زوج اتكتب من خمسين ألف سنة، الكعب العالي مش هيغير اسم زوج اتكتب من خمسين ألف سنة، التونيك والبنتلون والبدي مش هيغيروا اسم زوج اتكتب من خمسين ألف سنة.

اسم زوجك من قبل ما تتخلقي بخمسين ألف سنة مكتوب مش هيغيره الحجات دي، يا بنتي الله قادر اللي شق البحر لموسى مش قادر إنه يجيب لك أحسن عريس في الدنيا، يا بنتي الله قادر الله قادر اللي نجى إبراهيم من النار مش قادر إنه يجيب لك أحسن عريس في الدنيا.

### اتقوا الله في بناتكم

يا أمهات أنا بأوجه لكم رسالة اتقوا الله في بناتكم بنتك اللي في ثانوي اللي عاوزه تلبس الحجاب والنقاب، بنتك اللي في جامعة ماتقفوش في وشهم ماتقولوش هيدفنوا نفسهم ده هيحيوا نفسهم، انقذي بنتك من اللعنة، انقذي بنتك من الكبائر، انقذي بنتك من عدم قبول صلاتها، انقذي بنتك من إنها مش هتشم ريحة الجنة، انقذي بنتك من إنها تبقى من أهل النار، انقذي بنتك من إنها تبقى ملعونة، انقذي بنتك من الأحكام إنها تبقى منافقة، انقذي بنتك انقذيها لو خايفة عليها، ياللي بتخافي عليها من شوية الهوا بنتك هتجوز أحسن جوازة.

الملتزمات في أي دُفعة بعد خمس سنين من التخرج تلقى الملتزمات معظمهم أو كلهم اتجوز كلهم اتجوزوا وتلاقي التانيين هم اللي قاعدين، قاعدين يعني منهم خمسة مليون متبرجة قطعوا رزق بعض، يقول لك اتنين شحاتين قطعوا رزق بعض، هو أول القصة كانت واحدة اتبرجت ما عجبتش شاب يعني شاب مقطع البطاقة فراح متجوزها فكل البنات قالوا بس يبقى ده اللي بيحوز فملايين تبرجوا فخمسة مليون متبرجة قطعوا رزق بعض والعياذ بالله ما حدش يقطع رزق الثاني طبعًا كلهم للأسف خلاص ما عاdash ده ما عاdash ده المطلوب، إنت هتلبسي الحجاب الشرعي الكامل عشان تبقى مع أمهات المؤمنين في الجنة مش عداشان الدنيا خالص.

### مين اللي أحق إن ربنا يديها؟

يا بنتي افتكري "مَن ترك شيئًا لله عوضه الله خيرًا منه" صححه الألباني

اقفي قدام المراية وإنت بتعدلي طرحتك ونقابك ولبسك وإنت مش عايزه تبيني حاجة منك وقولي يارب أنا لبست كده عشانك وأنا واثقة إنك هتجيبلي أحسن عريس وواثقة إنك هتجوزني اللي أحسن من أي متبرجة هتاخده وواثقة إن لما هأتجوز هترضى قلب جوزي عليّ لما هأتجوز واحد ملتزم زي ما هي ملتزمة تبرجك ده هيخليك تتجوزي شاب فاسد، هايف، هايف عايزه تتجوزي واحد هايف! إنت حرة، عايزه تتجوزي راجل ملتزم مسؤول يصونك ويحفظك إنت برضه حرة.

حسب لبسك يا بنتي، لا يستويان.. اللي غطت عينيها واللي كحلت عينيها، لا يستويان اللي حطت الروح والأحمر والميك أب الكامل وكريم الأساس واللي غطت ملامح وشها لا يستويان يا بنتي **"أَيُّ الْفَرِيقَيْنِ أَحَقُّ بِالْأَمْنِ"**

الأنعام: ٨١

مين اللي أحق إن ربنا يديها زوج؟ أحسن زوج؟ مين اللي أحق إن ربنا يديها أحسن أولاد؟ مين اللي أحق إن ربنا يديها السعادة في الدنيا قبل الآخرة المتبرجة ولا المحجبة؟ **"أَيُّ الْفَرِيقَيْنِ أَحَقُّ بِالْأَمْنِ"** الشيطان هيجي، الشيطان هيجي بقی طيب أنا هأعمل إيه أنا خطيبي مش راضي، خطيبيك مش راضي؟! يعني إنت دلوقت لو جالك شغلانة في شركة بـ ١٠ آلاف جنيه في الشهر واليوني فورم نقاب مش هيرضى برضه؟

طيب لو خطيبيك قال لك معلش أنا عارف إنك إنت بتحبيني بس أنا مش هأقدر أجيب سفره، مش هتقدر تجيب إيه؟! سفره! ده النيش بيتطلقوا بعد كتب الكتاب عشانه، إشمعني في الحالة دي بقی خطيبي راضي ومش راضي **اقبعيه ماحدش هينفعك عند ربنا، ربنا ولا خطيبيك؟ ربنا ولا جوزك؟ ربنا ولا شغلك؟ ربنا ولا وظيفتك؟ ربنا والجنة ولا الدنيا واللي فيها؟**

**يا بنتي فوقي.. إنت أعلى من كده بكثير**

يا بنتي ارجعي لربنا يا غالية، يا غالية ياللي رخصتي نفسك، يا غالية يا لؤلؤة، اللؤلؤة بتتحط في علبة قטיפه شيك وتبقى في أرقى مكان، إنت ليه حاظه نفسك وسط الدنيا العفنة؟

لا يا بنتي إنت أعلى من كده بكثير قوي خطيبيك هيقول لك كده؟ لما خطيبيك يقول لك قولي له لأ إلا نقابي إلا ديني، طيب لما تيجي أمي تكلمني بقی هأعمل إيه اصمدي إنت صامدة، إنت قوية القطرة على القطرة تفتت الصخرة، ما تسمعيش لحد.

طب أنا دكتور هألبس نقاب إزاي؟ الجراحة بتلبس نقاب في أوضة العمليات عشان تقي نفسها في الدنيا طيب ما تقي نفسك من الآخرة هيمنعك عن إيه النقاب؟ طيب أنا خايفه يا بنتي أم سلمه ضحت بجوزها وولادها عشان ربنا، يا بنتي أم سليم ضحت بمهرها وشبكتها عشان ربنا، يا بنتي سمية ضحت بروحها عشان ربنا، أول واحدة متبرجة مش أخذت تريقة لما شبعت؟ أول واحدة لبست استرتش مش أخذت شتيمة في الشارع لما شبعت؟ كل متبرجة دلوقت مش بتأخذ تريقة طول الطريق لما شبعت؟ ما تهزبش اصمدي اصمدي وقومي أنا دلوقت داخل معاكم في أخطر عنصر يا جماعة أنا دلوقت داخل معاكم ماتقوليليش أنا مش قادرة هتقدري طيب استلني نقاب والبسيه قدام المراية في الأوضة بس والله ما هيهون عليكِ تقلعيه، نفذي الفكرة دي اوعي ماتنفذيهاش.

طيب مش ده عقوق لأمي وأبوي اللي رافضين؟ لا يا بنتي إنما الطاعة في المعروف مش عقوق هيقعدوني في البيت **"وَقَرْنَ فِي بُيُوتِكُنَّ"** الأحزاب: ٣٣ الحمد لله هيسبوني التعليم، الحمد لله جت من عند ربنا إن اللهم بتاع الجامعة ده تترحمي منه، أنا دلوقت هأكلكم يا بنات، أنا دلوقت هأكلكم يا نساء الأمة، أنا دلوقت هأقول لكم صفات الحجاب الشرعي ركزوا معايا بقی لأن دول آخر دقيقتين معانا وأخطر دقيقتين في البرنامج كله.

أنا قلت لك افتحي لي قلبك يا غالية اسمعي اللبس الملكي بتاعك، اسمعي اللبس الملكي، اسمعي لبس الملكات، اسمعي لبس ملكات الدنيا والآخرة شكلهم إيه؟ اسمعي لبس ملكات الفردوس الأعلى شكلهم إيه؟ يا غالية اسمعيني اسمعيني عشان ماتندميش.

### صفات الحجاب الشرعي

#### أولاً: صفات الطرحة

أنا هأمسك لك حاجة حاجة صفات الطرحة تكون **مغطية نص جسمك** يعني مش طرحة لغاية الرقبة ولا طرحة داخلية في الهدوم ولا طرحة اسبانس ماينفesch الكلام ده خالص ولا طرحة مخرمة ولا سورتيت ولا باروكة ولا خمس طرحات مع بعض ولا الربطات بتاعة الطرح بتاعة مواقع لف الطرح الكلام ده ماينفesch خالص ولا طرحة مطرزة الكلام ده لا، **تبقى طرحة مغطية نص جسمك على الأقل** يعني مغطية صدرك كمان، يعني نازلة كمان لما تحت الصدر ده الطرحة لازم تبقى دي صفات الطرحة الشرعية، طيب صفات العباية بقي؟

#### ثانياً: صفات العباية

ما ربنا قال "**يُدْنِينَ عَلَيْهِنَّ مِنْ جَلَابِيهِنَّ**" الأحزاب: ٥٩ مش من التونيك، مش من البنطلون، جلابيب عبايات العبايات الواسعة الكبيرة، **أول حاجة إن يبقى صدر العباية واسع مش صافف خالص الرسول** - عليه الصلاة والسلام - لما أهدى لسيدنا أسامة قبطي - ثوب غليظ - فسيدنا أسامة راح إداه لمراته فالرسول - عليه الصلاة والسلام - عرف فقال له "**مرها أن تلبس تحتها غلالة**" تلبس تحتها حاجة؟ ليه يا رسول الله؟ "**إني أخاف أن تصف حجم عظامها**" حسنه الألباني

يا نهار أبيض عارفه الكلمة دي يعني إيه؟ يعني لازم العباية اللي لابساها ماحدش يعرف إنت تخينة ولا ربيعة منها شوفي العباية واسعة أد إيه؟ زي الإذناء وزى الملحفة وزى الإسدالات الواسعة أوي أوي يعني ماحدش يعرف إنت تخينة ولا ربيعة يبقى صدر العباية واسع، عظامك يعني ماحدش يعرف إنت تخينة ولا ربيعة. طيب **والوسط بتاع العباية؟** ماينفesch يبقى ليها وسط أصلا لو لها وسط ماعادتش حجاب ماعادتش حجاب لأنها هتفصل جسمك، ماينفesch لازم تبقى واسعة فضفاضة.

**طيب وطولها؟** الطول بتاعها مقياسه إنك لما تقعد مافيش مشط رجليك حتى مايبانش، يا سلام على العفاف. **طب ولونها؟** أي لون بس مايقاش ألوان متداخلة وكاروهات مايقاش فيها تطريز، أي لون البسي أي لون إنت عايزاه، السيدة عائشة طافت بثوب معصفر مش مشكلة بس يبقى لون واحد مش ألوان متداخلة وخدي بالك احذري من **مفسدات الحجاب**

اللي هي إيه؟ التطريز اسمعي **التطريز، البارفان، الكعب العالي، الماكياج الأربعة دول هم مفسدات الحجاب** اللي بيخلوكي عامله زي اللي صامت لحد العصر فطرت وضيعت صيامها، زي اللي صلت الظهر ركعتين وسلمت ضيقت صلاتها، لا لا دول مفسدات الحجاب، طيب وبعد كده؟ وبعد كده ده حجاب الصالحة أمال حجاب المصلحة؟

**حجاب المُصلحة**

النقاب يا بنتي النقاب أنا عايز أقول لك دلوقت إن زوجات النبي كانوا لابسين إيه؟ نقاب، بنات النبي كانوا لابسين إيه؟ نقاب، نساء الصحابة كانوا لابسين إيه؟ نقاب، بنات الصحابة كانوا لابسين إيه؟ نقاب، النساء في عصور الإسلام كلها لحد ١٤٠٠ سنة لحد ثورة ١٩ كانوا لابسين إيه؟ نقاب.

**عايزة تبقي مع الطاهرات؟ البسي زيهم النبي** - عليه الصلاة والسلام - أقام غزوة كاملة علشان النقاب، اوعي تستقلي بيه ده إذا كان ربنا حرم إنك تكشفي إيدك الحته دي يحلل إنك تكشفي وشك؟! وشك اللي كل مفاتنك فيه! يحلل إنك تكشفيه ويحرم إنك تكشفي إيدك؟ يا بنتي لأ ده النقاب ده اللبس الملكي، ده اللبس العظيم ده ده إنت بعني حياتك لربنا إنت ضحيتي عشان ربنا شوفي ربنا هيديكي إيه؟ وربنا يرفعك في الجنة أد إيه بعد كده بقى

**حجاب السابقات**

اللي هو تتحجب وتتقرب وتمتنع عن الاختلاط بالرجال قال رسول الله - صلى الله عليه وسلم - "خير صفوف النساء آخرها" ليه؟ ليه أحسن صفوف آخر الصفوف النساء؟ لأنها أبعد صفوف عن الرجال "وشرها أولها" صحيح مسلم لأنها أقرب صفوف من الرجال، يعني كل ما تقربي من الرجال تبقي من شر النساء، كل ما تبعدني عن الرجال تبقي من خير النساء.

يبقى احتجتني حتى في أخلاقك ومعاملاتك عن الرجال أنا عايزك تاخدي القرار خلاص، عايزك تاخدي القرار، عايزك تاخدي القرار العظيم في حياتك، عايزك تاخدي أعظم قرار في حياتك من غير حجابك خلاص بقالك إيه من دينك من غير نقابك؟ من غير اللبس اللي الرسول - عليه الصلاة والسلام - كان دمه ودم الصحابة هيسيل عشان غطاء الوش بتاع المسلمة ده اتبقى لك أد إيه يلا خلاص خدي القرار.

**يلاً انضمي لقافلة الطاهرات**

يلاً انضمي لقافلة أمهات المؤمنين، يلاً انضمي لرضا الله سبحانه وتعالى، يلاً البسي اللبس اللي هيبقى عداد حسنات ٢٤ ساعة، يلاً توبي إلى الله من جريمة التبرج، يلا بيعي حياتك لربنا، يلا قرري هتقومي دلوقت هتعملي إيه؟ رقم واحد القرار هتقومي تتوضي وتصلي ركعتين وتصلي ركعتين توبة لله، تعاهدي ربنا إن خلاص أنا ماعدتش هألبيس غير كده يارب يا النقاب يا الخمار يا الإسدال يا العباية الواسعة مع الإيشارب الكبير اللي مغطي، اللي مغطي نصي أنا يارب ماعدتش هألبيس غير كده يارب وياريت لو بيقى النقاب الجميل ده أنا مش هألبيس غير كده خدي قرار وماتقوليهوش لحد خالص.

انزلي انزلي، ماينفعش دلوقت يبقى الصبح انزلي اشترى النقاب وروحي على بيت طيب أنا معايش فلوس، روحي استلفيها فيه أخت عامله مشروع على موقع way2allah دخله حوالي ٤٥٠٠٠ بنت ولبس مئات بسببه النقاب بفضل الله بتستخدم على المنتدى أي واحدة عندها مشكلة في النقاب تسمعها ولو عايزه فلوس نقاب تساعدنا جزاها الله خيرًا بعد كده استلفي الفلوس طيب وبعد كده روحي على بيت صاحبتك البسيه هناك وارجعني البيت منقبة

خَبَطِي السلام عليكم أخباركم إيه؟ إنت مين يا بنتي؟ ده أنا فلانة بنتك يا ماما، أول ما هتشوف كده دفنتي نفسك بالحيا ليه يا بنتي؟ ممكن تقول لك ألف مبروك وممكن تواجهك ساعتها القطرة على القطرة تفتت الصخرة اوعي تسمعي لأي حد اوعي إنت أخذتي القرار الصح توكلني على الله إنك على الحق اليقين ربنا فرحان بيك دلوقت وملايكة السما فرحانة بيكي عفيفة جديدة في قافلة الطاهرات.

### إنت عنوان للإسلام

اثبتني اصمدي هنقعك في بيتك.. الحمد لله ده أمر ربنا، هنسيبك التعليم.. الحمد لله خلصت من همه، هنحرمك من الميراث.. قتلي شهادة وسجني خلوة مع الله سبحانه وتعالى، يا بنتي إنت لو كنت عايزه يعني جزمة كعب ١١ سم قبل كده ومارضوش يجيوها بتعملي إيه؟

بتعطي، تقفلي على نفسك وتعطي، عطي لهم يا حبيبي عطي لهم أسبوعين اقعدي أسبوعين عطي بعد يوم واحد هيقولوا خلاص سيبوها هي حرة واللي اختارته ولما نلبس نقاب نلبس نقاب صح مش نقاب ٢٠١٠ مش نقاب استايل، مش نقاب ضيق، مش نقاب مطرز لأنك دلوقت عدتي عنوان للإسلام، عدتي عنوان للدين كله عدتي عنوان للسنة، مش نقاب وتكلمي ولد سواء كلام عادي أو غير عادي لأ تبقى خلاص عنوان مش نقاب وتبني عينيكي وتكحليها مش نقاب.

لأ نقاب سليم صحيح، نقاب لو الواحد بصّ لك نص ساعة مايعرفش يجيب ملمح من ملامحك، نقاب مايبيش منك أي حاجة لربنا، نقاب سوبر دارك فاميه، سوبر دارك فاميه أنا يارب سترت نفسي عن البشر عشان أعيش معاك في خلوة طول ما أنا ماشيه يارب إلى أن تأذن لي بأحسن زوج وأطيب زوج وأكرم زوج وأدين زوج لأنك إنت الكريم يارب ومش هتسبني أبداً يارب.

### خدي القرار عشان الدين ينتشر في المجتمع

القرار العظيم.. يا ترى كام واحدة أخذت القرار العظيم ده؟ يا جماعة إن شاء الله بإذن الله مع الحلقات "افتح لي قلبك" إن شاء الله بإذن الله هنعرف بقى عملنا إيه؟ أنا عايزك بقى تكلمي كل البنات وتدعو كل صاحباتك والله هيتأثروا لو تلبسي اللبس ده كله هيقلدك، البنات قلوبها طيبة وتتأثر يلاً يا بنتي، يلاً قومي، يلاً عشان الدين ينتشر في المجتمع، يلاً عشان العفاف يرجع، يلاً عشان اليهود يطعنوا في قلوبهم، يلاً عشان أعداء الباطن يمحقهم، يلاً عشان الفتن تنتهي، إنت اللي لو قفلتي باب الفتنة خلاص خلاص النقاب والحجاب الكامل حجاب أمهات المؤمنين أول خطوة في الطريق لربنا ده الخطوة اللي لو ماأخذتيهاش مش هتعرفي تتقدمي، مش هتقدري ولو أخذتها هتطلقني زي الصاروخ.

ربنا يشبتكم يا أخواتي في الله، ربنا يشبتكم يا بناتي ويا أخواتي ويا أمهاتي، ربنا يبارك فيكم، ربنا يحفظكم، ربنا يشرح صدوركم للإيمان، ربنا ييسر الهدى إليكم، ربنا يرفع الإسلام بيكم، ربنا يشبتكم على طاعته، ربنا يجعلكم قدوات في العفاف والطهارة والإيمان لكل نساء العالمين، ربنا يستخدمكم لنصرة دينه في الأرض.

لأنك غالية يا غالية كنت بأكلمك الليلة لأنك غالية، يا غالية، يا أول قلب نبض بالإسلام بعد رسول الله - صلى الله عليه وسلم - لأنك غالية رسول الله أقام غزوة كاملة عشان حجابك لأنك غالية هنفضل نكلمك ونناديك يا لؤلؤة الإسلام يا جوهرة الإسلام، يا نور حياتنا يا أمي ويا أختي ويا زوجتي ويا بنتي، يا نور حياة المسلمين كلهم، يا جوهرة يا غالية إن شاء الله بإذن الله أنا عارف إن ٥٠ واحدة هيلبسوا الحجاب الشرعي الكامل بسببك وإنّ هتلبسيه الليلة وهننشره في الدنيا كلها وهنبقى دعاة إلى الله لأنك غالية، جزاك الله خيرًا.

أقول قولي هذا وأستغفر الله لي ولكم، اللهم تب على بنات المسلمين، اللهم حجّب فتيات المسلمين، اللهم أنزل الهداية على فتيات المسلمين، اللهم زوجهن بالصالحين، اللهم بارك فيهن، اللهم اهد قلوبهن، اللهم استخدمهن لنصرة دينك في الأرض، اللهم احفظهن من الفتن ما ظهر منها وما بطن، اللهم اكرمهن بالأزواج الصالحين، اللهم تب على عاصيات المسلمين، اللهم استعملهن لنصرة دينك في الأرض يارب العالمين.

أقول قولي هذا وأستغفر الله لي ولكم، سبحانك اللهم وبحمدك أشهد أن لا إله إلا أنت أستغفرك وأتوب إليك وصلى الله وسلم على النبي محمد عليه الصلاة والسلام.

تم بحمد الله

شاهدوا الدرس للنشر على النت في قسم تفرغ الدروس تفضلوا هنا:

<http://forums.way2allah.com/forumdisplay.php?f=36>